

Gurasoek maiz egindako galderak: D eredua

Umea izatearekin batera une zoriontsu asko bizi eta, aldi berean, ardura berriak zeureganatzen dituzu. Onena eman nahi izanen diozu, noski, zoriontsu izan dadin eta bizitzan ahalik eta aukera gehien izan dezan. Beraz, hainbat erabaki zure esku daude. Horien artean, besteak beste, zein hizkuntza eredutan eskolatuko duzun aukeratzea.

Aukeraketa horretan, sarritan galderak sortzen dira, MEG: Maiz Egindako Galderak. Bada, horiei erantzuteko jarraian dator D ereduan izena ematearen inguru MEGen erantzunak:

Ingurunea erdalduna dut, bikotekidea, familia, lagunak... Nola lagunduko dut seme-alaba euskara ikasteko prozesuan?

Gurasoak dira seme-alaben erreferentzia nagusia bizitzako arlo gehienetan. "Zer ikusi hura ikasi" dio euskarazko esaera zaharrak eta halaxe gertatzen da hizkuntzen esparruan ere. Hortaz, egin dezakezuen onena da zuen arteko harremana euskaraz eraikitzea: [Gurasoak eredu hizkuntza ohiturekin ere](#). Dena den, horrez gain, honako aukera hauek ere zuen eskura daude:

- [ERArek baliabideak](#). Gogoratu etengabe osatzen dela.
- Euskarazko jardueren [agenda](#), zinemaz, antzerkiaz, ikuskizunez... gozatzeko.

Idea gehiago behar izanez gero, sartu [Dekalogoan](#). Bertan haurrak euskaraz hazteko 10 aholku aurkituko dituzu.

Eta are urrunago joan nahi baduzu, ez izan zalantzarik eta galdetu zure herriko [euskara zerbitzuan](#).

Etxean euskaraz egiten badugu, eta D ereduan izena ematen badugu, gaztelania ongi ikasiko du?

Bai, haurrak gaztelania ere ongi ikasiko du, eskolaren bidez zein ingurune sozialaren bidez. Izan ere, erdarak presentzia handia dauka bizitzako arlo askotan eta, jakin badakigu, haurrak uneoro hizkuntzak ikasten ari direla, ez bakarrik eskolan daudenean. Euskararen erabilerari dagokionez, zu zara zure haurraren eredu eta zure [erabilera ohiturak](#) erabakigarriak dira berarentzat. Inguruko euskaldunekin euskaraz egiten duzun heinean, hala egiten du zure seme-alabak. Gainera, [euskalkian](#) egiten baduzu, zure esku dago haurrari altxor hori transmititzea. Ez galdu aukera hori!

Nafarroara etorri diren lagun edo ezagunak ditut eta D ereduaren gaineko informazioa eman nahi diet beraien hizkuntzan. Nola egin?

Gurasoek maiz egindako galderak egokitu egin ditugu eta hainbat hizkuntzatarara itzuli: euskara, gaztelania, arabiera, frantsesa, portugesa, ingelesa, bulgariera eta errumaniera.

Etxean euskara edo gaztelania ez den beste hizkuntza bat daukagu. Ez da gehiegi izanen?

Ez, aukera bikaina da etxean beste hizkuntza bat ere transmititu ahal izatea. Gainera, haurrak eleaniztasunean ongi moldatzeko gai dira. Agian denbora gehiago beharko dute hizkuntza guztietan ongi hitz egiteko, baina garrantzitsuena azken emaitza da, ez dena ahalik eta azkarren ikastea. Prozesuan lagungarria da haurrek hizkuntza bakoitza pertsona batekin edo ingurune jakin batekin identifikatzea, errazago ikasten baitute. Hori dela eta, primeran dator errutinak eta ohiturak ongi finkatzea eta beti-beti errespetatzea.

Euskara ikasten ari naiz. Zer da hobe, dakidan hori haurrarekin hitz egitea, ala ez?

Euskaraz mintzatzeko [tarteka mugaturik](#) sentitzen bazara, lasai, ez estresatu. Aukeratu egoera eta une erosoak, eta horietan ahalegindu. Egokia izan daiteke, esate baterako, eguneroko [errutinekin](#) hastea. Eguneko jarduera bakoitzak aukera ematen du errutina goxoak sortzeko: [goizean](#) ohetik salto egitean, [eguerdian](#) indarrak berritzean... Den-dena ongi esaten ez baduzu ere, zure ahalegina eta motibazioa jasoko dute seme-alabek, euskararekiko [interesa eta maitasuna](#) adierazteak pisu nabarmena baitu. Gainera, inguruarekin ere osatuko da, hizkuntza eredu onak izanen baitituzte eskolan.

Nola funtzionatzen du murgiltze linguistikoaren metodologiak?

Hizkuntza-murgiltzearen oinarria da ikaslea bere lehen hizkuntza ez den beste batean eskolatzea, eskola-edukiak ikasten dituen bitartean bigarren hizkuntza hori ikas dezan: [Murgiltze linguistikoa eta hizkuntza eleanitza](#). Gaur egungo ikuspuntuak hezkuntza eleanitza kontuan hartzen du eta atzerriko hizkuntzak ezagutzea ere helburuen artean jartzen du.

Zer egin dezaket etxeko lanetan laguntzeko?

Lan egiteko ohitura eta eskolaren eta familiaren arteko komunikazio ona dira gako nagusiak. Edozein modutan, komeni da hezkuntza arloko profesionalek (irakasleek, pedagogoez) behin eta berriro azpimarratutako hainbat puntu nabarmentzea: irakurri [Etxeko lanak](#).